

## Galicia bate os seus récords de doazóns e transplantes de órganos

O ano pasado leváronse a cabo na rede de hospitais do Sergas **354 transplantes**, sendo os de ril os máis numerosos, con 170 // Deles, **31 foron de doante vivo** // O número de doadores de órganos cadáver foi de 116, a cifra máis elevada da súa historia // **Diminúe a taxa de negativas familiares** para a doazón



## IES ARCEBISPO XELMÍREZ II

O SISTEMA DE DOAZÓN E TRANSPLANTES DE  
ÓRGANOS EN GALICIA

Coordinación Autonómica de Transplantes

Martes, 29 de xaneiro de 2019



O Servizo Galego de Saúde acadou no pasado ano 2018 unha cifra récord de 354 transplantes de órganos nos seus hospitais, a máis elevada desde que se iniciou a actividade transplantatoria en Galicia. Do total de transplantes, 170 foron de ril; dos cales 31 procedían de doante vivo, 124 de figado, 2 de páncreas, 25 de corazón e 33 de pulmón. Salientar que, desde que se realizou o primeiro transplante, no ano 1981, ata o 31 de decembro de 2018, xa se levan feitos en Galicia un total de 7.942 transplantes de órganos.

Os resultados do ano 2018 poñen de manifesto a importancia en Galicia do programa de transplante de ril de doador vivo, cuns resultados moi superiores á media nacional, realizando un total de 31 intervencións no pasado exercicio. Desde 2001, realizáronse un total de 310 transplantes neste apartado. O 19% do total de transplantes de ril en Galicia procede de doador vivo. Ademais, as taxas de transplante de corazón, figado e pulmón atópanse por riba de media nacional.

#### **Doadores de órganos**

O número de doadores de órganos cadáver en Galicia se situou en 116 (70 na provincia da Coruña, 14 na de Lugo, 3 na de Ourense e 29 na de Pontevedra); dato co que Galicia rexistra o mellor ano en número de doantes nun exercicio, o que supón que haxa 43 doantes por millón de habitantes.

No que atinxe ás causas de morte dos doantes, os motivos principais foron os accidentes cerebro vasculares (69%), sendo a porcentaxe de doadores por accidente de tráfico de tan só un 4%. Con respecto á idade media do doador, foi de 61,1 anos.

A taxa de negativas familiares situouse o pasado ano 2018 nun índice de 16,5%, a cifra máis baixa desde o inicio da actividade transplantatoria e que rexistra unha diminución de cinco puntos con respecto ao ano anterior. Así mesmo, salientar que, actualmente, en Galicia 111.565 persoas teñen tarxeta de doador. Destas, 3.916 son novas tarxetas realizadas no 2018 pola Coordinación de Transplantes de Galicia de ADOS.

Polo que se refire á doazón de medula ósea, salientar que Galicia acadou o obxectivo establecido polo Plan Nacional de Medula Ósea, rexistrando 1.076 novos doadores. Deste xeito, Galicia conta con preto de 11.000 doadores de medula ósea rexistrados, o que supón un incremento de preto do 25% desde a posta en funcionamento do Plan Nacional.

#### **Programa educativo**

Doutra banda sinalar que a Coordinación de Transplantes de Galicia realizou 104 charlas a escolares no curso académico 2017-2018 para fomentar a doazón e nas que tomaron parte un total de 5.010 escolares. Así mesmo, desenvolveuse o Plan Proxecta: Educando en Valores, que abrangueu a 625 escolares e 39 profesores. A este programa engádense as visitas guiadas ata as instalacións de ADOS nas que tomaron parte 23 centros de ensino secundario e universitario e no que participaron 567 estudantes.

Ademais, convocouse, no pasado curso escolar, o III Concurso Universitario de Curtametraxes sobre doazón e transplante de medula ósea, e a primeira edición do Concurso de Carteis para Escolares relacionado coa doazón e o transplante. Ambos certames terán lugar novamente este ano así como a VI edición do Concurso de Curtametraxes para escolares relacionado coa doazón e o transplante.

#### **Actividade formativa**

A Coordinación Autonómica de Transplantes de ADOS continuou a desenvolver, ao longo do pasado ano, o programa de formación especializado en doazón e transplante de órganos para os profesionais do sistema público de saúde de Galicia. Mediante o desenvolvemento de tres seminarios de comunicación de malas noticias no proceso de doazón e tres cursos sobre proceso de doazón e transplantes, nos que se ofrece unha formación altamente especializada a 90 profesionais sanitarios. Salientar ademais o curso en doazón en asistolia controlada para persoal de Anestesia coa colaboración da Sociedade Galega de Anestesia e Reanimación e o primeiro curso de doazón e transplantes para MIR de primeiro ano en todos os hospitais galegos.

O Servizo Galego de Saúde e a Axencia de Doazón de Órganos e Sangue (ADOS) queren facer un recoñecemento público aos doadores e ás súas familias, pola valentía, a fortaleza e a xenerosidade que amosan neses momentos difíciles. Tamén queren agradecer ao conxunto da sociedade e dos profesionais dos hospitais galegos, xa que son os que posibilitan que as cifras de transplante se manteñan en Galicia.

<https://www.elcorreogallego.es/galicia/ecg/galicia-bate-seus-records-doazons-transplantes-organos/idEdicion-2019-01-15/idNoticia-1159263/>